

Date – 24/11/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Assam leh Mizoram mipuite inlaichhinna tha zawk a awm theih nan vawiin hian Dholai-ah 'Border Festival' a buatsaih dawn.
2. Siaha leh Lawngtlai district-a tuihri (cholera) leng avanga thi an awm belh tawh loh laiin hri leng hi khaw thenkhatah a darh avangin Myanmar ramri pawh khar zui zel a ni.
3. Prime Minister Narendra Modia chuan G-20 ramte chu hlep neia hlawkna um hmalakna aiin mihringte hlawk tlanna tur zawng turin a ngen.
4. Justice Surya Kant chu vawiinah Chief Justice of India 53-na turin vawiinah lakluh a ni dawn.

<><><>

MIZORAM-CACHAR BORDER FEST

Cachar District Administration chuan Assam leh Mizoram mipuite inlaichhinna tha zawk a awm theih nan vawiin hian Dholai-ah 'Border Festival' a buatsaih dawn.

Akashvani thudawn danin he hunah hian Assam leh Mizoram mipuite inkara inzawmna thar siam a nih theih nan hnam zia rang entirna hun hman a ni dawn a, infiamna hrang hrang pawh huaihawt a ni dawn a ni. Hemi chungchang ngaihtuah hian Zirtawpni kalta khan CDC Dholai office-ah thutkhawm a ni a. State pahnih atanga official kalkhawm te chuan he hun hlawhtling taka hman a nih theih nana inbuatsaihna hrang hrangte an thlirho a. Thutkhawmah hian Mizoram aiawhin Vairengte SDO (Civil) Pu H. Vanlalbiakzauva leh Mamit SDO (Sadar) Pu Lalnunfela Chawngthu te an tel a. Cachar lam atangin DDC Cachar, Pu Norsing Bey chuan thutkhawm hi a kaihruai a, District administration pahnih te inkara inthlunzawmna tha a awm a tul thu a sawi a ni.

<><><>

WATER SUPPLY

PHE Department hotute chuan Aizawl khawpui chhunga tui semchhuah hna a kal tluan thu leh harsatna an neih rih loh thu an sawi.

Akashvani News zawhna chhangin PHE department hotute chuan Aizawl khawpui chawmtu tlawng atangin Phase-1, Phase-2 leh Phase-3 hmangin tuang takin tui pump reng a nih thu an sawi a. Tunhnaiah nikhatah tui litre maktaduai 40 te an pump theih thu an sawi a, tui la tam lai, thal tak tak hma ni si a la nih avangin Aizawl khawpui chawmtu mai bakah Mizoram hmun dangah pawh harsatna an neih rih loh thu an sawi a. A hmaa chhe reng thin Phase-3 pawh tun thla tira a hman tan theih thu sawiin tuang takin khawpuiah chawl loin tui a pump mek tawh thu an sawi a ni.

PHE department hotute chuan tlawng tui chu an duh ang tawk an hmuh thu leh a tam lam leh a tui fim zawngah pawh a that lai tak a nih thu an sawi a. Tui a hnianghnar viau laiin khawpui chhunga semzaina lam chuan duhthu a sam tawk tawh loh thu an sawi a, tui semchhuah tam lam, distribution network chu tun aia darhzau leh chak zawk turin hma an lak mek thu an sawi a ni.

<><><>

MIZORAM, TELANGANA SPORTS

Mizoram leh Telangana chuan Inrinni khan sports hmasawna tura thawhhona thuthlung an ziak.

Telangana - North East Connect: A Techno-Cultural Festival-ah sawm a nih angin Sports & Youth Services Minister chu Inrinni khan telin ani ho hian thuthlung hi ziah a ni a. State pahnih official ten an ziah hnuah Inrinni zan khan Telangana Larsap Pu Jishnu Dev Varma leh Minister Pu Lalnghinglova Hmar te hian an inhlan a ni.

He festival-ah hian Spirit of the Game: Connecting Telangana and the North East' topic hmanga nimina sawihona hun hmanah Minister chuan thu sawiin Mizoram chuan football leh discipline thenkhata an hlawhtlin angin Olympic sports danga hlawhtlin dan kawng an dap mek thu a sawi a. Emerging Mizoram Sports (EMS) kalpui a nih dan tur pawh sawiin state pum dapa talent zawn chhuah hna an thawh dan turte leh chumi kawngah chuan Telengana nena infiammite intlawh tawn, coach inkal pawh tawn leh Telengana state-in sports hmunhna a neihte Mizoram infiammiten man chawi loa training-na atana an hman theih dan turte rawtna a thlen bawk a ni.

<><><>

LADC ELECTIONEERING

December 3 a Lai Autotomous District Council (LADC) inthlan awm turah State Election Commission ruahmanna hnuaiyah thuneituten fluang takin inthlang tura inbuatsaihna an kalpui mek a, Political Party leh Candidate leh an mahni puitute pawn theihtawp chhuahin vote an zawng mek.

Bial 25 awmna LADC ah hian Campaign boruak chuan a vung vanglai a hawlh chho tan a. Candidate leh an mahni puitute chuan In tinah luta, an mahni vote tura ngen chu Campaign na'na hmanrua hman rim leh langsar ber niin, Political Party ten Star Campaigner an ruatte'n theihtawp an chhuah mek bawk. Chief Minister Pu Lalduhoma leh MNF President Pu Zoramthanga te paw'n LADC Inthlan atan bawihpui thlakin Lawngtlai an tlawh tawh. MPCC Vice President Pu C.Ngunlianchunga chuan thutchilhin an party candidate te a campaign pui mek rualin, amah pawhin Lawngtlai Vengpui bial a chuh.

Inthlan Campaign-ah, hmun dang atanga an hruaitu lian ten an tlawh a nih loh chuan pawnlamah boruak sang leh ri hut hut hriat tur a awm mumal lova. Lawngtlai khawpui bikah khawlai ah vote dilna lehkha tar awm zeuh zeuh mahse, tun dinhmun ah chuan hmuhtur a la tam lova. A bikin khawpui pawn lam a, khawlai dungah party flag, poster leh banner intar erawh hmuh tur a awm nual. Bial hrang hrang atangin Model Code of Conduct bawhchhiatna lian tham thleng hriat tur a awm lova, pawnlamah boruak lian tak awm lova a lan lai-in, Candidate leh an mahni puitute chuan rusum an thlak vanglai tak a thleng chho mek thung.



CHOLERA

Siaha leh Lawngtlai district-a tuihri (cholera) leng avanga mi 9 bak an thih belh tawh loh lain hri leng hi khaw thenkhatah a darh avangin Myanmar ramri pawh khar zui zel a ni.

Siaha district bawrhsap Pu VL Hruaizela chuan a hma a khaw 3 a tuihri leng kha tunah chuan district chhunga khaw 7-ah a darh tawh tih a sawi a. Tuihri avanga mi 3 thi tih loh chu thih belh an awm loh thu a sawi a. Ramri hnaia awm khaw VC-te leh ramri a Police station leh outpost-te pawh Myanmar atanga Siaha district an lo luh theih lohna tura khauh taka ramri khar hna chu kengkawh turin an chah niin a sawi. Zoram Medical College & Hospital laboratory-a he hri veite sample an endikna-ah tuihri (cholera) a ni ngei tih finfiah a nih thu bawrhsap chuan a sawi bawh a ni.

He tih lai hian tuihri leng vanga mi 6-in nunna an chan phahna Lawngtlai district-ah chuan hri kai thar an awm belh tawh lo niin Lawngtlai a kan Corr chuan a sawi a. Lawngtlai district bawrhsap Pu Donny Lalruatsanga chuan containment area a Hruitezawl puan pawh nimin khan a hlip a. Chuti chung chuan Myanmar lam atanga lo luh chu khap chhonzawm zel a ni. Bawrhsap chuan Lawngtlai district atanga Hruitezawl kaltlanga sumdawngte'n Myanmar lama bungrua an phurh luh chu a phalsak a, Myanmar atanga mihring leh bungraw lo luh erawh chu khauh takin a la khap zui a. Myanmar lama bungraw phurhluh chungchang pawh fimkhur taka kalpui turin thupek a siam. Hruitezawl village council-te'n Myanmar lam atanga lawng lokir lehte pawhin bungrua leh mihring an phur lo ngei tih an lo chian tur a ni a. Myanmar atanga lokir lehte pawh an chenna hmun nen VC-te'n an chhinchhiah tur a ni a, ramri hawn a nih hma a ramri lehlam atanga lo lut reng reng chu Foreigners' Act hmanga thubuai siamsak an ni dawn a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



BIOMETRIC ENROLMENT

Mizorama Myanmar raltlan awmte kutzia leh mitnaute thla lak hna thawh mekah za zela 60 thelh zawh fel a ni tawh.

Home department atanga thu dawn danin Mizorama Myanmar raltlan awm mek hi mi 31,214 ni thin kha tun hnai-ah tlem leh hretin mi 30,815 awm mek anga chhinchhiah a ni a. Chu'ng zinga mi 18,265 te chu biometric enrolment a chhinchhiah tawh an ni a. Raltlan awm zat atanga chhut a za zela 59 point 27 a ni. Bangladesh raltlan 2,356 awm mek zinga za zela 11 thelh chu an kutzia leh mitnaute thla laksak an ni tawh bawh. Aizawl district-ah hian Myanmar raltlan 4,000 bawh vel an awm a, an kutzia leh mitnaute thla laksak hna hi zawhfel tep a ni tawh a. Raltlan awm tam berna Champai district leh a dawttu Lawngtlai district-ah te erawh chuan an tam em avangin za zela chhut

chuan chhinchhiah zat a la tam thei lo thung. Home minister Pu K. Sapdanga chuan he hna hi thawh zawh hun tur bituk a awm loh thu a sawi a, district tinah official-te'n an hna pangngai bakah theihtawpin an thawk chho zel a ni a ti.

Sorkar chhinchhiah danin Myanmar leh Bangladesh atanga raltlan mi 33,171 zet Mizoramah an awm mek a. Manipur a chi leh chi intihbuai avanga rawn raltlan hi mi 6,953 an awm mek a. Ram pahnih atanga raltlan leh thenawm Manipura atanga rawn raltlan zawng zawng hi tun dinhmunah an vai-in mi 40, 124 zet an awm a ni.

Mizoram leh Myanmar ramri thui zawng hi km 510 angin Home Ministry chuan a chhinchhiah a, Mizoram sorkar chhinchhiah dan erawh chuan km 404 a thui a ni a. A dung tluanin Mizoram Police Station 12 a awm mek a, Assam Rifles ten duty post eng emaw zat an nei bawk a. Mizoram leh Bangladesh ramri thui zawng hi km 318 a ni a. Mizoram Police Station 6 awmin BSF duty post eng emaw zat a awm bawk a. Manipur nena inrina-ah hian Mizoram Police outpost 8 a awm a, Assam nena inrina-ah outpost 22 awmin Tripura nena inrina-ah outpost 6 a awm bawk a ni.

Free Movement Regime hnuai-ah Myanmar a lut leh khilam atanga lo lut tur tan border pass pek chhuah thin a ni a. Kumin October ni 30 thleng khan border pass hi 21,238 pek tawh a ni. Pass hi hmun thum - Champhai district-a Zokhawthar, Hnahlan leh Lawngtlai district a Zochachhuah khua-ah te pek chhuah a ni.

<><><>

PM

Prime Minister Narendra Modia chuan G-20 ramte chu hlep neia hlawkna um hmalakna aiin mihringte hlawk tlanna tur, intluktlanga hamthatna dawn theihna tur leh khawvel ramte thawhona tha siam thei tur hmalakna nei turin a sawm. G20 Session thumnaah he thu hi sawiin Pu Modia chuan technology chu mihringte tante, khawvel pum hlawkpui tur leh inpawh tlanna thlen tura hman thiam a duh thu a sawi a. Hei hi India digital ecosystem hmahlir anih thu sawiin khawvel ramdangte pawh digital payment lamah thawhpui zel an ni a ti. Pu Modia chuan nakum February 2026 ah India chuan AI Impact Summit a thleng dawn tih a puang bawk a ni..

<><><>

CJI

Justice Surya Kant chu vawiinah Chief Justice of India 53-na turin vawiinah lakluh a ni dawn. President Droupadi Murmu chu Rashtrapati Bhavan-a lakluh inkhawm buatsaihah rinawman thutiamtirin a lalut dawn a ni. Justice Kant hian Chief Justice of India nilai Justice B R Gavai a thlak dawn a ni. Justice Surya Kant October ni 30 khan CJI atan ruat a ni a. Kum 2027,February ni 9 thleng a chelh dawn a ni.

<><><>